

**Siunnersuut uunga: Meeqqanik pinerliisimanginnermut uppernarsaatinik  
piumasaqaateqartussaataaneq pillugu Inatsisartut inatsisaata allanngortinnera pillugu  
Inatsisartut inatsisaat nr. xx, xx xx 2015-imeersoq.  
(Atuuffiata annertusinera)**

**pillugu**

**Inatsisinut Ataatsimiititaliap**

**ISUMALIUTISSIISUTAA**

**Siunnersuutip aappassaaneerpeqarnerani saqqummiunneqartoq**

Inatsisinut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Laura Tàunâjik, Siumut, siulittaasoq  
Inatsisartunut ilaasortaq Ineqi Kielsen, Siumut  
Inatsisartunut ilaasortaq Aaja Chemnitz Larsen, Inuit Ataqtigiit  
Inatsisartunut ilaasortaq Iddimangiiu Bianco, Inuit Ataqtigiit  
Inatsisartunut ilaasortaq Michael Rosing, Demokraatit, Ataatsimiititaliami sinniisussaq

**1. Meeqqanik pinerliisimanginnermut uppernarsaatit pillugit – aammalu inatsisissatut  
siunnersuutip imarisaa pillugu**

Meeqqanik pinerliisimanginnermut uppernarsaat tassaavoq pinerluuteqarsimasunik nalunaarsuiffimmit takussutissiaq meeqqanut 15-it inorlugit ukiulinnut kinguaassiuutitigut pinerliisimanagerit erseqqinnerusut pillugit eqqartuussutinik aalajangiinernillu<sup>1</sup> allanik imaqartoq.

---

<sup>1</sup> Eqqartuussutit aammalu akiliisitsinerit eqqartuussivimmi aalajangigaanngitsut (tassa akiliisitsissutit suliaq eqqartuussivimmut suliaassanngortinngikkaluarlugu pineqartup akilissallugit aalajangigai) saniatigut taakku assersuutigalugu tassaasinnaapput unnerluussutinik tunuartitsinerit.

Meeqqanik pinerliisimanginnermut uppersaatiip pinerluuteqarsimasunik nalunaarsuiffimmit takussutissianit allaanerussutigaa meeqqanik 15-it inorlugit ukiulinnik kinguaassiuutitigut pinerliinerit<sup>2</sup> aalajangersimasut kisimik tassani pineqarmata.

Aalajangikkap peerneqannginnermini ukiuni qassini pinerluuteqarsimasunik nalunaarsuiffimmi takuneqarsinnaanissaa pillugu maleruagassat immikkut ittut atuupput. Paasissutissat meeqqanik pinerliisimanginnermut uppersaatiit atugassat pinerluuteqarsimasunik nalunaarsuiffinit takussutissiani allani paasissutissanut sanilliullutik ukiunik arlalippassuarnik kingulliullutik nalinginnaasumik peerneqartarput. Piffissat atuuffii nikerarput, apequtaalluni kanngutsaatsuliorneq kinguneqaatissiissullu qanoq ittoq pineqarnersoq.

Naalagaaffiup politiivi pinerluuteqarsimasunik nalunaarsuiffik pillugu nalunaarut<sup>3</sup> naapertorlugu meeqqanik pinerliisimanginnermut uppersaatinik tunniussisartuupput. Sulisitsisup<sup>4</sup> qinnuteqarneratigut tunniussineq pisarpoq inuullu uppersaammi pineqartup akuersisimanissaa piumasaqaataalluni.

Meeqqanik pinerliisimanginnermut uppersaatinik piumasaqaateqartussaataaneq pillugu Inatsisartut inatsisaat atuuttoq (“meeqqanik pinerliisimanginnermut uppersaatiip pillugu inatsit”) malillugu pisortaqarfiit, suliffeqarfiit, atuarfiit peqatigiiffillu atorfinni atuuffinnilu erseqqinnerusumik nalunaakkani sulisussanik atorfinitsitsinnginnerminni suliaqartitsinnginnerminniluunniit pineqartut taakku suliamik ingerlatsinerminni meeqqanik 15-it inorlugit ukiulinnik toqqaannartumik attaveqartassappata meeqqanik pinerliisimanginnermut uppersaatinik piniartussaataapput.

Inatsisissatut siunnersuutikkut inatsisip atuuffia annertusineqassaaq:

Inuit sulinerminni meeqqanut 15-it inorlugit ukiulinnut *toqqaannartumik attaveqartartussat* meeqqanik pinerliisimanginnermut uppersaatinik siunissami kisimik pissarsiviginiarneqartassangillat, aammali inuit sulinerminnut atatillugu meeqqat 15-it inorlugit ukiullit *aalajangersimasumik akornanniittartussat*, taamaalillutillu meeqqanik taakkuninga toqqaannartumik attaveqarnissamut periarfissaqartut pissarsiviginiarneqartassallutik.

<sup>2</sup> Tassunga ilanngullugit ukiukitsunik qanigisarisunik atoqateqarnerit, ukiukitsunik atoqateqarnerit allatulluunniit kinguaassiuutitigut atornerluinerit, kanngutsaatsuliornerit kiisalu meeqqanik pornolianik suliaqarneq, siammarterineq pigisaqarnerlu.

<sup>3</sup> Pinerluuteqarsimasut qitiusumik nalunaarsorneqartarfianni inunnik paasissutissat suliarineqartarnerat pillugu nalunaarut nr. 881, 4. juli 2014-imeersoq (Pinerluuteqarsimasunik nalunaarsuiffik)

<sup>4</sup> Imaluunniit atorfeqartitaanermi pissutsit pineqanngippata, pineqartumik suliaqartitsisoq.

Tamatuma peqatigisaanik katersugaasiviit, kommunimi atuakkanik atorniartarfiit aammalu Nunatta Atuagaateqarfia suliffeqarfinnut il.il. meeqqanik pinerliisimannginnermut uppersaatinik piniartussaataasut nalunaarsorsimaffiannut ilanngunneqarput aammalu atuakkanik atorniartitsisartut atorfiit atuuffiillu meeqqanik pinerliisimannginnermut uppersaatinik piniarfiusussaasut nalunaarsorsimaffiannut ilanngunneqassallutik.

Kiisalu meeqqanik 15-it inorlugit ukiulinnik angajoqqaarsianut imaluunniit ilaqutariinnut oqilisaasunut inissiinernut atatillugu nutaartaavoq inoqutiginni 15-it sinnerlugit ukiullit tamarmik meeqqanik pinerliisimannginnermik uppersaateqarnissaannik pissarsiniartarnissaq. Aammattaaq tamanna atuuppoq kommunip aaqqissugaanik namminersortutulluunniit angerlarsimaffimmi paarsisartunut, paarsineq paarsisuusup angerlarsimaffiani pigaangat.

Naalagaaffiup oqartussaasuisa pinerluuteqarsimasunik nalunaarsuiffik pillugu nalunaarummik allannguinerisa kingorna inatsisip atuuffia annertusineqarsinnaalersimavoq.

## **2. Inatsisinut Ataatsimiititaliap inatsisissatut siunnersuut pillugu oqaaseqaatai**

### **2.1. Ataatsimut isigalugu**

Inatsisissatut siunnersuut siullermeerinermi tamakkiisumik taparserneqartoq aammalu atuuffissaata annertusineqarnera akuersarneqartoq Inatsisinut Ataatsimiititaliamit oqaatigineqassaaq. Tamanna minnerunngitsumik atuuppoq angerlarsimaffimmi paarsisartut aammalu angajoqqaarsiat ilaqutariillu oqilisaasut inoqutigisaat eqqarsaatigalugit.

### **2.2. Allannguutissatut siunnersuut**

Inatsisissatut siunnersuutikkut katersugaasiviit, kommunimi atuakkanik atorniartarfiit aammalu Nunatta Atuagaateqarfia suliffeqarfinnut il.il. meeqqanik pinerliisimannginnermut uppersaatinik piniartussaataasut nalunaarsorsimaffiannut ilanngunneqarput aammalu atuakkanik atorniartitsisartut atorfiit atuuffiillu meeqqanik pinerliisimannginnermut uppersaatinik piniarfiusussaasut nalunaarsorsimaffiannut ilanngunneqarlutik.

Katersugaasiviilli suliffeqarfinnut meeqqanik pinerliisimannginnermut uppersaatinik pissarsiniarnissamat pisussaaffeqartunut nalunaarsuiffimmut ilanngunneqarnerat atorfinnut atuuffinnullu meeqqanik pinerliisimannginnermut uppersaatinik pissarsiniarfiusussanut nalunaarsuiffiup annertusineqarneranik kinguneqanngilaq.

Katersugaasivimmi sulisut ilaat katersugaasivimmi takuniaasut akornanniittartut suliassanik nalunaarsuiffimmi atuuttumi ilaasutut isigineqarsinnaasunik isumagisaqartuupput.

Nalornissuteqartoqarnissaali pinngitsoortinniarlugu katersugaasivimmi sulisut atorfinnut atuuffinnullu meeqqanik pinerliisimannginnermut uppersaatinik pissarsiniarfiusussanut nalunaarsuiffimmut ilanngunneqarnissaat Inatsisinut Ataatsimiititaliamit kissaatiginartinneqarpoq. Inatsisinut Ataatsimiititaliaq inatsisissatut siunnersuummik tamatumunnga naapertuuttumik saqqummiussissaaq.

### **2.3. Meeqqanik pinerliisimanginnermik uppernarsaatinut killigitinneqartoq – 15-inik ukiulinnut killiliineq**

Oqartussaasup peqatigiiffiulluunniit il.il. meeqqanik pinerliisimanginnermut uppernarsaammik pissarsiniarnissamut qaqugukkut pisussaaffeqarnera Inatsisartut inatsisaanni taamaallaat maleruagassiorneqarpoq. Akerlianik meeqqanik pinerliisimanginnermut uppernarsaat sunik imaqassanersoq aammalu oqartussaasumut peqatigiiffimmulluunniit il.il. qaqugukkut taanna tunniunneqarsinnaatitaanersoq Inatsisartut inatsisaanni maleruagassiorneqanngilaq – aammalu maleruagassiorneqarsinnaanani.

Meeqqanik pinerliisimanginnermut uppernarsaatit imarisaat aammalu meeqqanik pinerliisimanginnermut uppernarsaatip tunniunneqarnissaanut suut piumasaqaataanersut pillugit maleruagassat naalagaaffimmi oqartussaasunit aalajangersarneqarput. Maleruagassat taakku malillugit meeqqanik pinerliisimanginnermut uppernarsaatit taamaallaat meeqqanut 15-it inorlugit ukiulinnut kinguaassiuutitigut pinerliinernut attuumassuteqassapput aammalu inunnik meeqqanik 15-it inorlugit ukiulinnut toqqaannartumik attaveqartussanik imaluunniit meeqqat 15-it inorlugit ukiullit aalajangersimasumik akornanniittartussanik atorfinitsitsinermi suliaqartitsinermiluunniit atugassatut taamaallaat tunniunneqarsinnaallutik.

Taamaattumik oqartussaasoq peqatigiiffiulluunniit il.il. inunnik *inuusuttuaqqat 15-it sinnerlugit* ukiullit toqqaannartumik akornanniittartussanik imaluunniit taakkununga attuumassuteqartartussanik atorfinitsitsinissamut suliaqartitsinissamulluunniit atatillugu paasissutissanik pissarsiniarnissamik kissaateqarunik tamanna pinerluuteqarsimanginnermik uppernarsaatinut ”nalinginnaasunut” maleruagassat atuuttut malillugit pisariaqarpoq.

Oqartussaasup peqatigiiffiulluunniit *inunnut 15-it inorlugit ukiulinnut kinguaassiuutitigut pinerliinerit pinnagit pinerluuteqarsimanerilli allat* pillugit paasissutissanik pissarsiniarnissamik kissaateqarneranni tamanna aamma atuuppoq. Tassa inunnut 15-it *sinnerlugit* ukiulinnut kinguaassiuutitigut pinerliinerit pillugit paasissutissat aammalu kinguaassiuutitigut pinerliinerit pinnagit pinerliinerilli allat (assersuutigalugu nakuusernerit) pillugit paasissutissat.

Aalajangiiffigisassatut siunnersuummut (UKA 2010/66) Inatsisinut Ataatsimiititaliaasimasup allannguutissatut siunnersuutitut saqqummiussaa Inatsisartunit 2010-mi akuerineqarpoq. Aalajangiiffigisassatut siunnersuutip akuerineqarnermisut iluseqartup nassataraa meeqqanik pinerliisimanginnermut uppernarsaatit pillugit inatsisip allangortinneqarnissaanut periarfissiinissaq siunertaralugu Naalakkersuisut naalagaaffimmi oqartussanut saaffiginneqqullugit peqquneqarnerat, taamaaliornikkut meeqqanik pinerliisimanginnermut uppernarsaammik pissarsiniarnissamut pisussaaffik inunnik inuusuttuaqqanik 15-18-it akornanni ukiulinnik attaveqartartussanik atorfinitsitsinermi/suliaqartitsinermi aamma atuussinnaaqqullugu.

Meeqqat pinerlineqannginnissamut sapinngisamik illersorneqarnissaannut pisussaaffik meeqqanut tamanut ukiup inersimasutut naatsorsuussaalerfiup tungaanut tunngaviusumik atuuttariaqartoq ataatsimiititaliaq isumaqartoq taamani Inatsisinut Ataatsimiititaliap

aalajangiiffigisassatut siunnersuummut isumaliutissiissutaani allassimavoq, aamma tak. Meeqqat pillugit isumaqatigiissut.

Inatsisinilli atuutsitsinermut ministereqarfiup Naalackersuisunut nalunaarutigaa naalagaaffimmi oqartussaasut Kalaallit Nunaannut tunngatillugu taamatut annertusisitsilersaanngitsut. Inuit inuusuttuaqqanik 15-18-it akornanni ukiulinnik attaveqartussat atorfinitsinneqarnerat/suliaqartinneqarnerat meeqqanik pinerliisimanngininnermut uppersarsaatnik aqqissuussinermut ilanngunneqarnerat inatsisunik atuutsitsinermut ministereqarfiup isumaa malillugu maanna aqqissuussinermik ilusiliinermi isiginiarneqartut atorunnaassapput. Taamaalilluni meeqqanut kanngunartuliortartut (tassa inuit meeqqanik atoqateqarnissamut inuuttunik kinguaassiuutitigut kajungerinnittartut) atorfinni suliaqarfiniluunniit meeqqanik kinguaassiuutitigut pinerliinissamut atornerlunneqarsinnaasuni atorfinitsinneqarnissaasa pinaveersimatinneqarnissa aqqissuussinerup siunertaraa.

Inatsisunik atuutsitsinermut ministereqarfiup isumaanik issuaaneq malillugu tassani inerniliunneqarsimasorinarpoq inuusuttuaqqat 15-it 18-illu akornanni ukiullit meeqqanut kanngunartuliortartut eqqarsaatigalugit illersorneqarnissamik pisariaqartitsinngitsut: Inuusuttuaqqat 15-it 18-illu akornanni ukiullit meeqqanut kanngunartuliortartunit kinguaassiuutitigut pinerlineqarnissamut navianartorsiunngillat, tassa meeqqanut kanngunartuliortartut meeqqanik ukiukinnerunik kinguaassiuutitigut kajungerisaqartarmata.

Pinerluuteqarsimasunik nalunaarsuiffimmit takussutissiaq taanna immikkut ittoq ulluinnarni meeqqanik pinerliisimanngininnermut uppersarsaammik taaneqartaraluartoq taaguutip allap ilaannilu atorneqartartup, tassalu ”pædofili-attest”-ip (meeqqanut kanngunartuliorsimanngininnermut uppersarsaatip) atorneqarnissa tulluarnersaaq.

Tamanna Inatsisinut Ataatsimiititaliamit maluginiarneqarpoq.

Inatsisinulli Ataatsimiititaliaq isumaqarpoq meeqqat – tassa inuusuttuaqqat 15-18-illu akornanni ukiullit – kikkulluunniit inunnit meeqqamik paarsitinneqartunit kinguaassiuutitigut pinerlineqannginnissamut inuiaqatigiinnit sapinngisamik illersorneqartariaqartut.

Pingaartumik tassunga atatillugu inuk 15-18-inik ukiulimmik paarsitinneqartoq danskit pillaasarnermut inatsisaanni § 223-mik / Kalaallit Nunaanni pinerluttulerinermi inatsimmi § 80-imik (inumik 18-it inorlugit ukiulimmik qitornavissiarisamik, qitornassamik qitornarsiamilluunniit imaluunniit ilinniartitassanngortinneqarsimasumik kinguaassiuutitigut atoqatiginninneq) unioqquitsinermut siusinnerusukkut eqqartuunneqarsimanersoq eqqumaffigissallugu immaqa tunngavissaqarsinnaavoq.

15-18-inik ukiullit inunnit paarsisiminnit kinguaassiuutitigut atornerlunneqarsinnaanermut illersorneqarnissaat pinerluuteqarsimanngininnermik uppersarsaatit ”nalinginnaasut” pillugit maleruagassat malillugit pisinnaavoq.

Atorfinni aalajangersimasuni il.il. atorfinitsitsinermi atugassatut  
pinerluuteqarsimanngininnermik uppersarsaammik immikkut ittumik pineqartup

akuersitinneratigut pisortani oqartussaasut maleruagassat taakku malillugit pissarsiniarsinnaapput. Pinerluuteqarsimannginnermik uppersarsaatip taassuma imarissavai danskit pillaasarnermut inatsisaannik (aammalu nunatsinni pinerluttulerinermi inatsimmik) unioqutitsineri atugassarititaasut malillugit eqqartuussutit, akiliisitaanerit aammalu unnerluussutit taamaatiinnarneri pillugit paasissutissat. Aammattaaq taassuma imarai eqqartuunneqarnikkut kiffaangissusiiagaanermik pineqaatissiisoqarluni imaluunniit piginnaatitaaffinnik, assersuutigalugu biilersinnaatitaanermik arsaarinnittoqarluni inatsimmik allamik unioqutitsinerit pillugit aalajangiinerit. Paasissutissat pineqaatissiissutit naammassineqarneranit pinerluuteqarsimannginnermut uppersarsaammi takuneqarsinnaanerit ukiuni qulini atuutissaaq.

Pinerluuteqarsimannginnermut uppersarsaammik taamaattumik pissarsiniarnissamut peqatigiiffiit namminersortut il.il. periarfissaqanngillat. Inuk peqatigiiffiup atorfinitsinniagaa suliaqartinniagaaluunniit “namminerisamik pinerluuteqarsimannginnermut uppersarsaammik” pissarsiniaqqullugu takutitseqqullugu peqatigiiffiup qinnuigisariaqarpa.

Namminerisamik pinerluuteqarsimannginnermut uppersarsaatip taamaallaat imarai pinerluttulerinermi inatsimmik / pillaasarnermut inatsimmik aammalu ikiaroorartut pillugit inatsimmik<sup>5</sup> unioqutitsineri eqqartuussutit akiliisitsissutillu pillugit paasissutissat. Paasissutissat namminerisamik pinerluuteqarsimannginnermut uppersarsaammi allassimasarput ukiuni marlunni-tallimani<sup>6</sup>.

15-18-inik ukiullit inunnit paarsisuminnit kinguaassiuutitigut pinerlineqannginnissamut illersorneqarnissat meeqqanik pinerliisimannginnermut uppersarsaatit pillugit maleruagassat malinnagit taamaallaalli pinerluuteqarsimannginnermut uppersarsaatit pisortatigoortut namminerisallu pillugit maleruagassat malillugit pisinnaammat pingaartumik pisuni marlunni pingaaruteqarpoq:

Siullermik meeqqanik pinerliisimannginnermut uppersarsaammi paasissutissat pinerluuteqarsimannginnermut uppersarsaatini pisortatigoortuni namminerisanilu paasissutissanut sanilliullutik piffissami kingumoortumi sivilisunerusumi allassimasarput. Eqqartuussutit il.il. meeqqanik pinerliisimannginnermut uppersarsaammi allassimasut pineqaatissiissutit naammassineqarneranit ukiut 20-t aatsaat qaangiukkaangata aammalu kinguaassiuutitigut pinerluutinut sakkortuunut atatillugu pinerliisoq aatsaat 80-inik ukioqaleraangat peerneqartarput. Pinerluuteqarsimannginnermut uppersarsaammi pisortatigoortumi eqqartuussutit il.il. pineqaatissiissutit naammassineqarneranit ukiut qaangiunnerini peerneqartarput aammalu namminerisamik pinerluuteqarsimannginnermut

<sup>5</sup> Kiisalu palleqqusinninneq, sumiiffimmeeqqusinninneq peersitaanerlu pillugit inatsit. Inatsit Kalaallit Nunaannut atuutinngilaq.

<sup>6</sup> Inaarutaasumik aalajangiisoqarnerani ukiut marluk kingorna akileqqusissutit peerneqartarput. Eqqartuussutit allat inaarutaasumik aalajangiinnermit ukiut pingasut qaangiunneranni – taamaattorli paarnaarussivimmiittussanngortitaanerup/pinerluuteqarsimasunut inissiisarfimmiittussanngortitaanerup naammassineqarnerata kingorna aatsaat ukiut tallimat qaangiunneranni.

uppersaammi pineqaatissiissutip naammassineqarneranit ukiut marluk-tallimat qaangiutiinnartulli.

Aappasaanik pinerluuteqarsimanginnermut uppersaatini pisortatigoortuni namminerisanilu kinguaassiuutitigut pinerluutit kisimik ilaatinneqanngillat. Pinerluuteqarsimanginnermut uppersaat pisortatigoortoq pillaasarnermut inatsimmik unioqquutitsinernut tamanut eqqartuussutit il.il. pillugit paasissutissanik imaqarpoq. Aammattaaq pinerluuteqarsimanginnermut uppersaat pisortatigoortoq eqqartuunneqarnikkut kiffaangissusiagaanermik pineqaatissiisoqarluni imaluunniit piginnaatitaaffinnik, assersuutigalugu biilersinnaatitaanermik arsaarinnittoqarluni *inatsimmik allamik* unioqquutitsinernut sunulluunniit eqqartuussutit il.il. pillugit paasissutissanik imaqarpoq. Namminerisamik pinerluuteqarsimanginnermut uppersaatip imarai pillaasarnermut inatsimmik aammalu ikiaroonartut pillugit inatsimmik unioqquutitsinernut suugaluartunulluunniit eqqartuussutit il.il. paasissutissat.

Taamaalilluni sulisitsisoq / pineqartumik suliaqartitsisussaq pinerluuteqarsimanginnermut uppersaammik pisortatigoortumik/namminerisamik pissarsiniarnermigut siusinnerusukkut pinerluutigisimasat 15-18-inik ukiullit pinerlineqarsinnaanermut illersorneqarnissaat eqqarsaatigalugu attuumassuteqanngitsut pillugit paasissutissat pissarsiarissavai. Naak paasissutissat taakku 15-18-inik ukiullit illersorneqarnissaat aammalu suliaq pineqartup suliarisassaa eqqarsaatigalugit attuumassuteqanngikkaluartut (assersuutigalugu tillitanik atueqataanermut imaluunniit sillimmassiissutinik peqquserluuteqarnermut eqqartuussut ukiunik arlalinnik pisoqaassusilik pillugu paasissutissat) qinnuteqartoq ajornerusumik inissinneqaratarsinnaavoq: tassa sulisitsisoq inummik pillarneqarsimangivissumik atorfinitsitserusunnerummat.

Allatut oqaatigalugu atorfinitsitsinernut atatillugu pinerluuteqarsimanginnermut uppersaatinik nalinginnaasumik pissarsiniarnerup inuit siusinnerusukkut pillarneqarsimasut/pineqaatissinneqarsimasut suliffittaarniarnerat ajornakusoortilersinnaavaa, naak pinerluut eqqartuussutaasoq pineqartup atorfimmi pineqartumi atorfinitsinneqarnissaanut mattussissutaasariaqanngikkaluartuq. Taamatut siunertaanngitsumik sunniteqassappat ajuusaarnassaaq, tassami suliffiit suliasallu inuiaqatigiinnut akuuleqqinnissamut iluaqutaammata pineqartup pinerluuteqaqqinnissaanut iluaqutaasut.

Naak 15-18-inik ukiullit inunnit paarsisuminnit kinguaassiuutitigut pinerlineqannginnissamut illersorneqarnissaat pinerluuteqarsimanginnermik uppersaatinut "nalinginnaasunut" maleruagassat malillugit pisinnaagaluartuq meeqqanik pinerliisimanginnermut uppersaatinut maleruagassat assingi malillugit taamatut illersuinissaq isumagineqarsinnaappat naapertuunnerussagaluartuq Inatsisinut Ataatsimiititaliaq isumaqarpoq.

Apeqqut taanna Folketingip eqqartuussiveqarnermut ataatsimiititaliaanut Inatsisinut Ataatsimiititaliap eqqumaffigeqqulersaarpa.

#### **2.4. Oqaaseqaatit allat**

Meeqqanut kanngunartuliortartut siornatigut meeqqanik kinguaassiuutitigut atonerluisimasut atuuffinni meeqqanut toqqaannartumik attaveqartarfiusuni sulilersinneqannginnissaannut suliaqartinneqannginnissaannullu meeqqanik pinerliisimannginnermut uppersaatinik piumasaqaateqartussaataitaanermut inatsisip peqataaqataanissaa siunertaavoq. Taamaalluni paaqqinnittarfinni, peqatigiiffinni assigisaannilu meeqqat paaqqutarineqarnerannut akisussaaffimmik tunniussivigisatsinni meeqqanut kanngunartuliortartunit kinguaassiuutitigut atonerlunneqarsinnaanermut meeqqat illersorneqarnissaat inatsimmi siunertaavoq. Siunertarineqartutulli illersuinissami piumasaqaataavoq meeqqanik pinerliisimannginnermut uppersaammik pissarsiniartussaataitaanermik inatsimmi piumasaqaat oqartussaasunit pisortallu suliffeqarfiutaannit, taamatullu peqatigiiffinnit namminersortunit il.il malinneqarnissaa. Taamaammatt inatsimmi piumasaqaataasut pillugit sakkortusisamik paasisitsiniaanermik suliniuteqartoqarnissaanik pisariaqartitsisoqarnersoq inatsisillu malinneqarnera pillugu naammattumik nakkutilliisoqarnersoq isumaliutigeqqullugu Naalakkersuisut Inatsisinut Ataatsimiititaliamit **kaammattorneqarput.**

### **3. Inatsisinut Ataatsimiititaliap inassuteqaataa**

Ataatsimiititaliaq isumaqatigiittoq allannguutissatut siunnersuummik saqqummiussivoq.

Taama oqaaseqarluni Inatsisinut Ataatsimiititaliap siunnersuut aappasaaniigassanngortippaa.



---

Laura Tàunâjik,  
Siulittaasoq  
*Siumut*

---

Michael Rosing  
*Demokraatit*

---

Ineqi Kielsen  
*Siumut*

---

Aaja Chemnitz Larsen  
*Inuit Ataqatigiit*

---

Iddimangiiu Bianco  
*Inuit Ataqatigiit*